

Goglatti

kiragoon id weer ideen wee daachchintaan bitaanga kummunnan. ter wiida jamman eskaleel juu shogolinnan. in ideenli jaaw tannig jooga issee tannig kaash iskira amanga ollija ididdan tawwo sukkoosin jellig taddan aawalleya. juun ididdan giidta goora urti tannig kabkir indaaleeg doolechcha ittirtood tannig dikkechcha kin noogla. kikkan man issee tariin iskissiintookka markechchinnan, amantookkoon ollechchinnan kiragoon jediidlog iiwga jooga isseeg atta amanga jediidlog olin, ingir ekkir kabakka idir ittir tannig niffeffaan duunya dukrangoosin. ingeentaan aaga meskooson. meskoosagoon banynyon woo allaahu wo ilaahi, ayga diimaan ingir tuug aag jugirdeeninnan, ayga aman goglatti tereda ikkangoon noogka irnyiterekka deennon. ideentood juntangooson, shaharka oomir ekkir orroosongoon daayag arrisan. hillan uttuukkon filaan aag orrinay doola kir jammisan. ugdarangoosongoon eddil dummisan ooyil dummisan orreda kiragoon goglatti weekka unnooson. in daayali adwoosagoon wiyyan tiigooson. aademirii takka issigsan mina? irim hussan aagii? tar hussooso. bitaan tammii aag wiigmeeni? bitaan daari daammunna iyyon. minaa? aman goglatti weeyi darda fala nogon. aademiriikkon kalla wiirkoosa gedoochchisan. daayakkon gasi weekka koddikir irjir fentig koddikir irjira, kiidiroosa enja nogooson. idikko takkoli jamman tiigoochchisan. idli ittirka niffin, kaba mallekka aawin, tar fiini. id meskoosagoon iigatiron ay doorrin jelligoon aawa tawwon jelligoon aawa meskoosis. ir toodta unnedafiimun walaa buruug unnedafiimun enja kutta jelli inni weekka nal. kuttagoon aag aawsiin naattin iiwga jaawlog joogja isseeg attoosa ittir tanga niffoosa aman tanga ollija ididdan jellilaak sukkooson. man indaleeg aag markoli juwon markalleya. shibirka iskiroosa indaleeg aag tiffin. banynyon: hoy, talla tar aneen awrin indaleetootta mugon. tibitta tibitta maaragoon gedooson. amanga aag juun olloli ollalley juwongoon banynyon: hooy tar aneen awirn amantootta talla mugon. tibitta tibitta maaragoon gedooson. isseeg aag sokkotood juwon talla tar aneen awrin isseetookka mugoose iyyon gedooson. ideentoollin indaleetood tannig doola kaagintaan ittirtood tannig dikka kaagintaan kiron. juukangoon aman orgon jangafin isseetookka juu guunykangoon fin mallel agartood tanna fin noorka hamdoosagoon ittir tanga okkir deey tanga urra kaba tannig idir kabeda aagini id kiron. in jellili wiida yoom uwwoo tuskog ingir nogon. idli issigon ele uttuun as, irli owwollo issee annig sokkechchisan indalee annig ennechchisana iigoosa yaan jaawga aag joogini yaan jediidin amanga aag ollini ay aag kiss. issaatta tammii ir kabj aagin ay aag kiire? banynyon: noor mowla dungiroochchon. yoom weekka wiida sultaan wee oshshi tanniddan dooga nogafin. in kashshin noog manguun aagjellaakingoon oshshig olowooson juun amanga ekkireya. oshshi toora juu

fukkeel dereenyongooni, hey iyyon tokkon tar santeelog sultaanga amanga aawirtittam, juun gaalo gaskog galloosa. santee seydiig sokka tarafin gaalokka galla abreeg idra sultaanga amanga aawirtir. in oshshiili aag menja tibittin. tammii wee kawwimuuni noogin tuulaya. towwilongoon sultaanni oogron mina amanga ekkimmiya. banynyon wallaahi wee banynyin walaa elaammun. iigon tariin banynyisiin agarratoon sokkeda kimmi walla kir faranylog gumur innig sokkeyya? juu gaalokka guunykan santee eddi iridlog dummaammuunnan daaffin. manga gallikan abree nuluwood fashsha gaalolla daaffin. abree tannig sokk idir aman tannig idir sultaanga aawroottiron. niyeda kiidaad tannig takka tiroosa iigatiron neechcha jelewoosa tariin fiisiinn agarra echchuu iskire iyyon. echchuu iskiroosagoon nogechchisan. yoom weekkoon sultaanli kerril dooga kir sukkon. naloochchagoon shaayga neechcha agka banynyechcha ay buruu unnig edalleya daalle iyyon. iigsan: uu buruug kummun, uu asli bitaanga unnaammun, uu asli jawarangaammun. ebedin ayl innaska fa edil. iigon orrek kallek issigj aylon bitaanga unnaakkeeg. banynyon: fuudeeg neenaa, noog innin tuultoon fuudeeg fa edir. nabikka dukkilog kaagin shongirka dukkilog kaagin aasa foogjatichcha nogooson. ideenli ay buruu weekka hiddotoon arrooyya, naall ayga buruu weekka fa deenoosiy banynyintaan aagingoon yoom weekka gojir tanga gojoosa karaama tannig aawoosa in oshshi maygeegoog olowon, juun man kerrin shaakkuul sultaanga diyafiinay iigeya. juu banynyongoon ideenli fala menja wiigjon hillan uttuukkon jammisan wiigintaani. ideenli banynyon ay naayga dummeda nogya ay naayga wegeda nogyaya. goglattikkon darda fala kiron keffan shaddi ashriillo, maany finjaan ashriillo shaarbin killi ashriillo, ooyin hug ashriillo ay minnog juu uruug onyooyya, daratti darattee uuy biyyu! melaykariin tood wee goosin kaassilog fin tannessiriikkon habbaabalog habbibateentaan aagjinnan, tubbi tangoon maar aagjisan. man dardintaan nogafiingoon in takka hiilooson man tan aag aawekko man tan banynyekkoyi. ihingiya jigjon, jigjisiin wakittoon goos fasooson, jigjisiin wakittoon goos fasooson, middakoo diisikkokkon sukkachchon. kiragoon tannessiriig iigatichchon man ardin tawwolog nogafiikko tanneengokka ayga taachchadeenanay. juusangoon mena iriin firgekka mennaye iyyon aydottooni, banynyon ay weekka firgimun, inga innessiriiltoon weerakiron. halaas maanyga kuffirana iyyon. kuffikir gallikkangoon, tanessiriiltoon weeranga, ooyin hug ashriinga maany finjaan ashriinga shaarbin killi ashriinga keffan shaddi ashriinga malaakanga melaaykariin buruu angooson. aademirii mallekkon uruug diyafiinay onyintaan nogafiijinnan gasrin moollo juusangoon doorrotoon uruuli sukka kir aademiriig waayjintaan aruusa tannig dumm echchuu doorin kolodittido okkiroosa aademiriig karaamag kabkiroochcha ideen tannakir dummeda edoosa tiigon aygon balee tennil aagintaan eleelan kiss!